

## Nouri, 14j.



### suechet äs nöiis Daheime i Wohnigshautig

Liebi Tierfründe

Hoi, ig bi d'Nouri, das isch arabisch u bedütet Licht. Originäu, gäu? Wo ig doch cholrabeschwarz bi. Abr drum schriib ig gar nid, ig wott Öich vo mim gröschte Wunsch verzälle: ig bi uf dr Suechi nach emem nöiie Daheime. Warum? Mini Familie het sich trännt, sy hei viu wäniger Ziit für mi u ou weniger Platz. Abr es Schlimmschte: üse Hung wohnt immr no bi mir. U ig mag Hüng nid, die räge mi nur uf. Itze suech ig äs nöiis Plätzli. Drum!

Ig bi kaschtriert, gimpft (grundimmunisiert), schtuberein u sähr aahänglech. Ig liebe: schmüsele (da chan ig so richtig ufdringlech wärde), pläuderle (ig geb ou Antwort), ufm Sofa höckle u fernseh luege (mit Dir zäme, uf Dim Schoss). Ig mag nid: Hüng! Ig chenne nur Wohnigshautig, reicht mir, nur en gsicherete Baukon, das hätt ich gärn wiedr, zum Sünnele u Vögeli Luege. Ching u Hung wott ig nid, gärn abr es liebs Chatzegschpändli, zu zwöit macht's Läbe dopput Schpass. Bi es Troumbüsi, gäu? Da wär abr no öppis, ig bi nid ganz gsung. Ig ha Diabetes u bruuche eimau am Tag es Medi, nehme ig abr problemlos i eme Schlecki. Du söttstch abr dr Bluetzuckr u d'Ketone regumässig mässe, nid dass da öppis i'd fausche Richtig geit. Das cha mer abr lehre, isch nid so schlimm, ig bi ou e Liebi. S'Medi isch ou nid grad günschtig, leidr, abr s'hiuft u das zählt doch, odr?

Ig suechi liebi Lüüt mit viu Ziit, die mi uf Läbensziit wönnt verwöhne u uf mini Gsundheit achte. Bisch Du villiicht pensioniert u hesch viu Ziit odr bisch Du sunsch viu daheime? U hesch Du en Baukon mit ere schpannende Uusicht? U womöglech no es liebs, nid dominants Gschpändli für mi? Das wär's! Denn müesst mir üs unbedingt lehre chenne. Ah ja, ig wohne derziit z'Utzenstorf/BE, zügle abr gärn zu Dir, wo ou immr Du wohnsch. Mäud Di doch bitte ganz gly bi dr Sonja Ball. Sie het sich mir agno u suechet für mi das nöii Plätzli.

Dini Nouri



**Katze sucht Mensch - Mensch sucht Katze**

Sonja Ball

Tel.Nr. 079 333 45 62 (werktags 18-20h)

[sonja.ball@bluewin.ch](mailto:sonja.ball@bluewin.ch)